



來去炕窯仔（北四縣腔）

今晡日係禮拜日，食飽晝大家毋知走到哪位去了？佢試著無落無著，自家在廳下个凳仔坐等啄目睡，滿叔走來問佢：「愛跔佢兜去掌牛無？」佢趑趑起來又坐倒下去，講：「吾姆會罵！」

因爭為上擺佢跔佢兜去掌牛，佢兜打著十過隻禾鷄兒，焙到半生熟，害佢食到痲痲肚。吾姆講：「下二擺做不得跔等去掌牛了！你恁大仔定定，牛相鬥也毋知好走，會分牛仔踏死喔！」

毋過，佢試著掌牛比掌鵝仔較生趣，因為掌鵝仔佢當驚鷄婆來夾走鵝子，阿婆會講佢恁毋壁。佢就無想著佢正恁大仔，鷄婆都比佢較大哦！佢在天頂飛來飛去，吾頭那都昂忒了，佢愛夾走鵝子佢續奈得何？

掌牛个時節，滿叔會將牛仔綯等，還會帶人公書去分佢看，佢講：「看著別人个牛仔走過來愛遽遽喊佢，做不得分牛仔相鬥角，轉去也毋好講佢將牛仔綯等，正毋會害佢分阿公罵。」

有一擺，佢兜走歸半下晝都無倒轉來，上屋个牛仔走來，同阿伯公个牛仔相鬥，佢驚到會死，又尋毋著佢兜，就坐到遠遠看，試著當生趣，還迂工去喊阿梅蘭來看。上屋个牛仔比阿伯公个較大隻又無綯，阿伯公个牛仔分佢鬥到一身血汀汀仔，好得四叔轉來看著，同上屋个阿叔擎著擔竿合牛拂仔正將佢兜分開。

今晡日佢兜又毋知走到哪位去了，細姑同吾姐逐等鵝仔轉夜了？佢兜正走等轉來，手上拿著一包東西，行兼正打開來，原來係三條番薯。這番薯同平常時焗个無共樣呢！鼻著當香，又毋會烏疏滴搭，看起來當好食个樣仔。滿叔同路叔一儕一條，伸一條。佢正想愛伸手去接，未知細姑在吾後背先搶走了！

滿叔講：「佢迂工較慢兜仔拿出來，告知你又走倒轉來。先分細人仔，你恁大人毋好同佢爭。」細姑講：「你係無分佢，佢轉去愛投阿叔。」緊講緊走，一下就無看著影了！

滿叔將佢自家手上該條拗一半分佢，正經當好食呢！佢問滿叔：「這番薯仰恁好食呢？」佢講：「這係阿炎仔佢兜打窯兒炕个，下禮拜佢俚也來做。」

毋知仰般日仔續變到盡難過，總算分佢望到禮拜日了，佢打早就去尋滿叔，毋過佢講：「朝晨愛去同學个屋下，下晝正做得去打窯仔，你先去尋樹杈合竹節。」佢應：「好，做得湊阿梅蘭去無？」佢講：「做得。」

佢同阿梅蘭兩儕盡煞猛，透朝晨在該撿竹節合樹杈，三叔姆問佢兜：「仰恁煞猛？拈到个柴愛分麼人燒？」阿梅蘭應講：「不知。」三叔姆講：「阿清蓉，你恁精得著，天光

日輪到若姆煮飯，你愛拈柴分若姆燒還喊吾梅蘭搵手。」佢遽遽應講：「毋係啦！這係滿叔愛用个！」三叔姆講：「這兜細鬼仔又在該搵麼个鬼？佢又毋使煮飯，做麼个喊你兜撿柴呢？」佢毋知好同佢講麼，盲知佢跔等又講：「佢知了，又愛偷挖番薯去炕窯仔呵！仰會毋驚分若公罵？」

食畫个時節滿叔碗一下放忒，佢就遽遽跔等厥後背走出去，佢先在田上挖一個坑，將柴草全部放落去、點著火，佢問佢：「番薯做得放落去無？」佢講：「盲愛！等柴燒過，火灰拿出來正做得放！」佢試著有一息兒奇怪，火燒過仰還做得焔呢？毋過佢無再過問。

柴盡遽就燒過了，滿叔將火灰拿出來，泥壁全部都燒到紅紅，滿叔講要先壅兜泥粉，番薯正毋會燒忒，勻好泥粉將番薯放落去，面頂再結到像人个墓樣仔。滿叔講：「恩先來份園人尋，到臨暗兒打開來就做得食了！」

佢無想搞園人尋，就在該掌等，不知不覺續睡忒去，毋知過忒幾久，佢鼻著一陣香味，擘開目珠，看到滿叔當在該挖番薯，一大群人圍等看，口水合滿叔个汗水強強就會跌落番薯竇。佢偷偷仔算一下，有十過儕。哎！無閒歸日，一儕分一條就無罅咧！毋過也異生趣就係了！

創作理念

每個人都有童年，雖然有些人的童年生活並不是那麼美好，但是經過時間的沉積，不好的雜質析出後，所有回憶都會變得甜蜜和美好，為了讓別人分享這份美好，我把我的童年往事記錄下來，希望得到相同世代的朋友們的共鳴。

因為我是一個客語教學人員，在教學的過程中時常有感於教材的缺乏，故將自己童年的生活用客語寫成故事，讓小朋友在學習中了解他們父、祖輩的生活景況。同時也增加他們學習的興趣。

黃清蓉

興仁國小母語教學支援人員

